

# INUIT ATAQATIGIIT

## INATSISARTUNI



Nuuk 19. maj 2014

Inatsisartut Suleriaasianni § 37 naapertorlugu matumuuna Naalakkersuisunut imaattunik apeqquteqaateqarpunga:

(Inatsisartuni ilaasortaq, Naaja Nathanielsen, Inuit Ataqatigiit)

### Apeqqutit:

- 1) **Naalakkersuisut Nukissiorfiit aktieselskabinngortinneqarnissaanut aalajangeereerpat? Akissutip aappiunera imaluunniit naamiunera apeqqutaatillugu suliap ingerlanissaa eqqarsaatigalugu tamanna itisileqquneqarpoq.**
- 2) **Nalunaarummi allassimavoq Rambøll januar/februar 2014-mi aktieselskabinngortitsinermi ajoqutissanik iluaqutissanillu misissueqqissaartinneqarsimasoq. Naalakkersuisuusimasup Miiti Lyngep majimi 2013-imi nalunaarusiortitsiniarluni nalunaaruteqarnera eqqarsaatigalugu tamanna qanoq ataqatigiippa<sup>1</sup>? Allamik nalunaaruteqarparpa, imaluunniit nalunaarusiortoqarneranik Inatsisartunut nalunaaruteqarnermiit aatsaat qaammatit arfineq-pingasut qaangiunnerini nalunaarusiassaq suliakkiissutigineqarsimava?**
- 3) **Nukissiorfik aktiaateqarluni ingerlatseqatigiiffinngortinneqarpat Naalakkersuisut qanoq iliuuseqarlutik nuna tamakkerlugu atuisut imermik, sarfamik kiassarnermillu pilersorneqarnissaat qulakkeerniarpaat? Kalaallit Nunaanni inoqarfiit tarmamik pilersorneqarsinnaaqqullugit ingerlatseqatigiiffik pilersuisussaataitanermik pisussaaffilerneqassava? Ingerlatseqatigiiffik sarfamik, imermik kiassarsinnaanermillu innuttaasunut tamarmiusunut pilersuisussaatinneqassappat, tamanna nalinginnaasumik aktiaateqarluni ingerlatseqatigiiffiit namminersorlutik tullerii-aaralutik ingerlatsisinnaanerannut qanoq tulluussorineqarparpa?**
- 4) **Naalakkersuisut qanoq iliuuseqarniarpat aktiaateqarluni ingerlatseqatigiiffik Nukissiorfiit aalajangerpat atuisuminnit akit tunisassiorneq tunngavigalugu pilersinneqartut aallaavigalugit (akit piviusut) akiliisitsisalerniarpat? Akit piviusut tunngavigalugit atuisut akiliisinneqartassanngippata, taava kikkut ullumikkut akit nammaqatigiinneq tunngavigalugu appasitsinneqarnerinut matussusiisalissappat? Aningaasartuutaalersussat ingerlatseqatigiiffinngortup nammineq aningaasaataanit imaluunniit nunatta karsianit sullissinermi isumaqatigiissuteqarnikkut matususerneqassappat?**
- 5) **Aalisakkerinermik tunisassiorfiit ullumikkut ukiumut 90 mio. koruunit missaanik sarfamik imermillu atuinerminnut akikillisaaffigineqartarput. Aktiaateqarluni ingerlatseqatigiiffiup Nukissiorfiit tapiissuteqartarnerup taassuma peerneqarnissaa aalajangiuppagu Naalakkersuisut tamanna akuerilersaarpaat? Taamaanngippat ingerlatseqatigiiffiup aningaasaataanit tamanna imaluunniit nunatta karsianit Nukissiorfiit A/S-imut sullissinermik isumaqatigiissuseqarnikkut aningaasalersorneqassava?**

---

<sup>1</sup> [http://inatsisartut.gl/documents/para3637/2013/svar/042\\_Nukissiorfiit\\_najn\\_svar.pdf](http://inatsisartut.gl/documents/para3637/2013/svar/042_Nukissiorfiit_najn_svar.pdf)

- 6) **Nukissiorfinnut tapiissutaasartup 2019-ip tungaanut ukiumut 10 mio. koruuninik millisarneqartarnissaanik pilersaarutigineqareersoq Naalackersuisunit attatiin-narniarneqarpa?**
- 7) **Nalunaarummi allassimavoq Nukissiorfiit aktieselskabinngortikkutigu imaluunniit aktieselsabinngortinngitsukkutsigu Nukissiorfiit akigititaanut, aningaasalissutaa-nut, pilersuisussaataitaneranut il.il. , ingerlatsivik piffissamut ungasinnerusumut pilersaarusiorsinnaaqullugu sinaakkutit naalackersuisunikkut sulialinnit erseq-qissarneqartariaqartut.<sup>2</sup> Tamanna anguniarumallugu Naalackersuisut qanoq sulia-rilersaarpaat? Tamannalu UKA 2014-imi oqallisigineqassasoq takorloorneqarpa?**
- 8) **Nalunaarummi erseqqilluinnartumik allassimavoq Nukissiorfiit aggulunneqarnis-saa kommunillu piginnittunut ilanngutitinnegarnissaat aqutseqataalernissaallu naapertuunnanilu atuisunut akitsorsaataassasoq.<sup>3</sup> Naalackersuisut taamatut nali-liinermut tunngavilersuutigineqartunullu isumaqataappat?**
- 9) **Nalunaarummi erseqqilluinnarpoq Nukissiorfiit akiitsuminik utertitsinissaminut imaluunniit Namminersorlutik Oqartussaniit akiitsut tigusissaannut ajornaku-soortitsisorujussuussasoq. Aktieselskabinngortitsinermi Nukissiorfiit akiitsutigut pisussaaffiitut Naalackersuisut qanoq eqqarsaatersuuteqarpat?**

**Tunngavilersuut:**

Nukissiorfiit aktieselskabinngortinneqarnera atuisunut annertoorujussuarnik kinguneqar-nerluttussaavoq, pingaartumik Nuummi Sisimiunilu najugaqanngitsunut. Taamaattumik isumaqarpunga Naalackersuisut Nukissiorfimmik aktieselskabinngortitsiniarneranni innut-taasut isumaliutersornermi akuutinneqarnissaat pingaaruteqartoq.

Naalackersuisut Nukissiorfiit aktieselskabinngortinneqarnissaannut nalunaarummut tusar-niaatitseqqammerput. Nalunaarut 2. aprilimii 6. majip tungaanut, tassa sapaatip akunnerini tallimangajanni, påskip nalaani, tusarniaassutigineqarsimavoq.

Naalackersuisut suleqatigiinnissaminnut isumaqatigiissutaanni atuarneqarsinnaavoq Nukis-siorfiit aktiaateqarluni ingerlatseqatigiiffinngortinniarnegassasoq. Maanna ingerlatseriaat-simi akinillu pilersitsinermi atuisut akornanni nammaqatigiinneq tunngaviuvoq, taamaa-lillunilu Nuummi Sisimiunilu atuisut kiisalu nunatta karsiata tapiissuteqartartarnerisigut sinerissap sinnerani, illoqarfinni nunaqarfinnilu atuisunut akit tamanut naammaginantut akigitinneqartarput.

Akit pilersinneqartarneranni nammaqatigiinnerup attatuarnissaa aalajangiusimaneqarnis-saalu Inuit Ataqatigiinnut pingaarutilerujussuuvoq. Nukissiorfik aktiaateqarluni ingerlatse-qatigiiffinngortinneqarnissaa siusinnerusukkut siunnersuutigineqaraangat taamaamat aamma akerliusarsimavugut. Missingersuusionerit takutereerpat akit tunisassiornermi tunngaviusut atuutsinneqassappata, tamanna assersuutigalugu Oqaatsuni 1 kilo watt-imut akit koruuninik qulingiluanik akisunerulernerannik kinguneqassasoq. Inuit Ataqatigiinniit isumaqarpugut naammaginantumik akeqartitsineq kiisalu nunamut tamarmut tutsuiginar-nerusumik pilersuisinnaaneq qulakkeerneqassasoq Nukissiorfiit imminut suliffeqarfittut aquttuuppat taamaalillunilu aktiaateqarluni ingerlatseqatigiiffinngortinneqanngippat.

Ernummatigaara Naalackersuisut pilersaarutaata kingunerissagaa innuttaasut Nuummi Sisimiunilu najugaqanngitsut pilersorneqarnerminnut akiliinerusalissasut. Innuttaasut sine-rissap sinneraniittut naammaginantumik nammaqatigiinnermillu tunngaveqartumik akiliisa-riaqarnerat eqqarsaatigigaanni, tamassuma saniatigut ernummatigaara Nukissiorfiit aktiaa-teqarluni ingerlatseqatigiiffinngortinneqaruni sipaarutaasut sullissinissamut isumaqati-giissusionermermi aningaasartuutaajumaartussanit ikinnerussasut.

<sup>2</sup> Qallunaatuuani qup. 21-iippoq

<sup>3</sup> Qallunaatuuani qup. 23-iippoq

Aktiaateqarluni ingerlatseqatigiiffik tutsuiginartumik ingerlanneqartup qulakkeertussaavaa pigisami nalillit imminut akilersinnaasumik ingerlanneqarnissaat, minnerpaamillu ajunaaru-taangitsumik ingerlanneqarnissaa. Nukissiorfiit aktiaateqarluni ingerlatseqatigiiffinngortinneqarpata tamanna innuttaasut imermut, sarfamut kiassarnermullu akiliutigisartagaannut annertuumik kinguneqarnerluttussaavoq - akit naammaginartumik inissisimatinniarlugit Nukissiorfiit Namminersorlutik Oqartussallu akornanni sullissinissamik isumaqatigissusiorto-qanngippat.

2009-mi Attaveqatigiinnermut Avatangiisinullu Naalakkersuisoqarfiup Nukissiorfik aktiaateqarluni ingerlatseqatigiiffinngortinneqassagaluarpat tamanna qanoq kinguneqassanersoq pillugu kikkunnnulluunniit attuumassuteqanngitsunut misissortippaa. Misissuinerit Ernst-consulting-ip suliarai, tassanilu manna atuarneqarsinnaavoq: "akit allanngortinnagit naammaginartumik ingerlatsinermi sinneqartooruteqarnissaq pilersinneqarsinnaanngilaq, taamaaliornikkullu tutsuiginassuseqartumik pigisat akiitsullu naligiissarneqarnerat sanarfineqarsinnaanatik". Taamaalilluni ersarissisinnearpoq Nukissiorfiit aktiaateqarluni ingerlatseqatigiiffittut imminut akilersinnaasutut ingerlanneqassappata, taava akit tunisassiorneq tunngavigalugu pilersinneqartut aallaavigalugit (akit piviusut) akilersuisitsisariaqassasoq taamaalillunilu siusinnerusukkut nammaqatigiinneq tunngaviusoq qimanneqartariaqassalluni.

Ullumi Namminersorlutik Oqartussat Nukissiorfiit sinnerlugit aningaasanik attartortarpoq, attartukkallu Nukissiorfimmit nunatta karsianut akilersorneqartarput. Namminersorlutik Oqartussat attartornerminni atugassarititaasut pitsaanagerusut pissarsiarisinnaavaat. Nukissiorfiit nunatta karsia avaqqullugu siunissami aningaasanik atorniartalissagaluaruni, attartorniarneq akisunerulissaaq, akiliisussatuallu tassaapput atuisut.

Apeqqutinnut akissuteqaatit tassaappata nammaqatigiinneq ingerlatiinnarniarneqartooq tapiissuteqartarnerlu assignngitsutigulluunniit ingerlatiinnarniarneqarluni, Nukissiorfillu sinnerlugu nunatta karsia aningaasanik attartorniartartuussasoq, taava Nukissiorfiit suli aktiaateqarluni ingerlatseqatigiiffinngortinniarneqarnera paasiuminaalligaluttuinnassaaq. Taava tassani Namminersorlutik Oqartussat Nukissiorfiillu aqutsisuisa avissaanganerulernissaat kisimi patsilersuutaavoq. Naalakkersuinikkullu ingerlatseqatigiiffimmut akulerussimanissap annikillisarneqarnissaanik pisariaqartitsineq allatut angusinnaaneqartariaqarpoq.

Apeqqutit ullut 10-t suliffiusut iluanni akeqquneqarput.